



Broj/ Број : 02/2-50-1-23-26/09

Sarajevo/ Сарајево: 25..5.2009. godine

ZAPISNIK

26. sjednice Komisije za vanjsku i trgovinsku politiku, carine, saobraćaj i komunikacije

Doma naroda

Parlamentarne skupštine Bosne i Hercegovine, održane 18.5.2009. godine

Sjednicu Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH (u daljnjem tekstu: Komisija) sazvala je predsjedavajuća Komisije Alma Čolo.

Sjednici Komisije, u svojstvu članova, prisustvovali su: Alma Čolo, Adem Ibrahimpašić, Rudo Vidović, Branko Zrno i Slobodan Šaraba, te Nenad Pandurević, sekretar, i Dobrinka Savić, stručni saradnik u Komisiji. Opravdano je odsustvovala Dušanka Majkić.

Sjednici su, u svojstvu predlagача i izvjestilaca, prisustvovali: Jerko Ivanković Lijanović, poslanik u Predstavničkom domu Parlamentarne skupštine BiH kao predstavnik predlagача Zakona o zaštiti domaće proizvodnje u okviru Sporazuma CEFTA, Dušan Nešković i Dragiša Mekić, pomoćnici ministra vanjske trgovine i ekonomskih odnosa BiH, Sead Avdić, savjetnik u Kabinetu ministra vanjskih poslova BiH, i Mitar Pavić, šef Odsjeka za međunarodnopravne poslove u Ministarstvu vanjskih poslova BiH, Murveta Džaferović, pomoćnik ministra, Vedran Mulabdić, viši stručni saradnik iz oblasti zaštite javnog reda, Ismail Sarić i Ankica Tomić, šefovi odsjeka u Ministarstvu sigurnosti BiH, Bejta Ramović i Biljana Tabaković, šefovi odsjeka u Ministarstvu finansija i trezora BiH, Nino Čorić, predsjedavajući Vijeća Agencije za poštanski saobraćaj BiH, Fikret Gaćanović i Delivoje Đerić, članovi Vijeća Agencije za poštanski saobraćaj BiH, Lamija Kozarić, direktor Izvozno-kreditne agencije BiH, Savo Marjanac, direktor Sektora privrede u Vanjskotrgovinskoj komori BiH, i Maja Ribar, savjetnica u OHR-u.

Sjednica Komisije počela je u 12 sati.

Nakon što je konstatirala da postoji kvorum, predsjedavajuća Komisije Alma Čolo predložila je sljedeći

DNEVNI RED

1. Usvajanje Zapisnika 25. sjednice Komisije;
2. Razmatranje Prijedloga zakona o zaštiti domaće proizvodnje u okviru Sporazuma CEFTA (druga komisijska faza), predlagач: Predstavnički dom PSBiH;

3. Razmatranje Prijedloga zakona o postupku zaključivanja i izvršavanja međunarodnih ugovora, prva komisijska faza, predlagач: Vijeće ministara BiH;
4. Davanje saglasnosti za ratifikaciju Protokola protiv nezakonite proizvodnje i trgovine vatrenim oružjem, njegovim dijelovima, komponentama i municijom, kojim se dopunjava Konvencija Ujedinjenih naroda protiv transnacionalnog organiziranog kriminala;
5. Davanje saglasnosti za ratifikaciju Protokola između Ministarstva sigurnosti BiH i Ministarstva unutrašnjih poslova i javne uprave Crne Gore o provođenju zajedničkih patrola uz zajedničku državnu granicu;
6. Davanje saglasnosti za ratifikaciju Sporazuma između Vijeća ministara BiH i Vijeća ministara Republike Albanije o raedmisiji lica koja iregularno borave;
7. Davanje saglasnosti za ratifikaciju Prvog amandmana uz Sporazum o zajmu potpisan 25. jula 2002. godine između Bosne i Hercegovine, koju zastupa Ministarstvo finansija i trezora BiH, i Kraljevine Španije, koju zastupa Ured kreditnog instituta – Finansiranje sistema vodosnabdijevanja u općini Olovo;
8. Razmatranje Izvještaja o radu i finansijskog izvještaja Agencije za poštanski saobraćaj BiH za 2008. godinu;
9. Razmatranje Izvještaja o radu Upravnog odbora Izvozno-kreditne agencije BiH za 2008. godinu;
10. Razmatranje izvještaja i informacija Ministarstva vanjskih poslova BiH:
 - Informacija o sastanku Komiteta za vanjske poslove Evropskog parlamenta (AFET), Brisel, 31. 3. 2009.;
 - Izvještaj o posjeti ministra vanjskih poslova BiH Svena Alkalaja Republici Hrvatskoj;
 - Izvještaj o posjeti Salija Beriše, predsjednika Vijeća ministara Republike Albanije;
 - Informacija o liberalizaciji viznog režima – pismo osam ministara zemalja-članica EU upućeno Komisiji EU, odnosno predsjedavajućem Vijeća EU, u vezi s liberalizacijom viznog režima za zemlje zapadnog Balkana;
 - Informacija o ratifikaciji Sporazuma o stabilizaciji i pridruživanju sa BiH;
 - Informacija o plenarnom zasjedanju Evropskog parlamenta – usvajanje rezolucija o Zapadnom Balkanu i BiH;
11. Razmatranje izvještaja o međunarodnim aktivnostima parlamentarnih komisija i delegacija PSBiH:
 - Izvještaj s parlamentarnog seminara „Vize i upravljanje granicama“, Brisel, od 31.3. do 1.4.2009.;
 - Zabilješka sa sastanka Beriza Belkića i Ilije Filipovića s Monitoring timom Sekretarijata Vijeća Evrope;
 - Izvještaj sa sastanaka Komiteta za kulturu, nauku i obrazovanje (Pariz, 10. marta 2009.) i Komiteta za pravne poslove i ljudska prava (Berlin, 23. i 24. marta 2009.) Parlamentarne skupštine Vijeća Evrope;
 - Izvještaj sa 120. zasjedanja Skupštine Interparlamentarne unije, održanog u Adis Abebi, od 5. do 10. aprila 2009.;
 - Zabilješka sa sastanka članova Zajedničke komisije za evropske integracije PSBiH s delegacijom Zajedničke komisije za evropske poslove Parlamenta Irske, održanog u Sarajevu, 4. 3. 2009.;
 - Izvještaj sa 11. međuparlamentarnog sastanka Zajedničke komisije za evropske integracije PSBiH s delegacijom Evropskog parlamenta za odnose sa zemljama Jugoistočne Evrope, održanog u Briselu, 20. i 21. 1. 2009.;
12. Tekuća pitanja.

Predloženi dnevni red usvojen je jednoglasno.

1. Usvajanje Zapisnika 25. sjednice Komisije

Zapisnik 25. sjednice Komisije usvojen je jednoglasno.

2. Razmatranje Prijedloga zakona o zaštiti domaće proizvodnje u okviru Sporazuma CEFTA (druga komisijska faza), predlaže: Predstavnički dom PSBiH

Predsjedavajuća Komisije Alma Čolo podsjetila je prisutne na dosadašnju proceduru ovog zakonskog prijedloga u PSBiH. U tom smislu istakla je da je predlaže Zakona Predstavnički dom PSBiH. Prijedlog zakona usvojen je u Predstavničkom domu na 46. sjednici, održanoj 18.2.2009., a Domu naroda dostavljen je 20.2.2009. radi razmatranja i usvajanja. Dodala je da je Dom naroda Parlamentarne skupštine BiH usvojio Prijedlog zakona u prvom čitanju na 28. sjednici, održanoj 27.4.2009., i tom prilikom usvojio i sljedeći zaključak: „Zadužuje se Vijeće ministara BiH i nadležno ministarstvo da, zbog poremećaja na tržištu i ogromnog deficita u međusobnoj razmjeni poljoprivrednih proizvoda, preduzmu aktivnosti na pronalaženju odgovarajućih rješenja u pravcu zaštite poljoprivredne proizvodnje u Bosni i Hercegovini“.

Predsjedavajuća Komisije podsjetila je da je amandmanska faza istekla 12.5.2009. i da na Prijedlog zakona nisu uloženi amandmani. U nastavku je informirala prisutne da je u međuvremenu od usvajanja Prijedloga zakona u Domu naroda u prvom čitanju Ministarstvo vanjskih poslova BiH dostavilo pismo ministra vanjskih poslova i evropskih integracija Republike Hrvatske Gordana Jandrokovića ministru vanjskih poslova BiH Svenu Alkalaju u kojem se, između ostalog, konstatira da je „donošenje i primjena ovakvog protekcionističkog i diskriminirajućeg Zakona u potpunosti neopravdan potez koji će imati posljedice ne samo na naše bilateralne odnose, već i na cjelokupan kredibilitet BiH, dovodeći u pitanje njenu sposobnost u ispunjavanju preuzetih obaveza zadatih okvirom procesa stabilizacije i pridruživanja“.

Predsjedavajuća Komisije konstatirala je da do održavanja sjednice Komisije nije dostavljen bilo kakav odgovor Vijeća ministara BiH u vezi sa zaključkom Doma naroda, usvojenog prilikom usvajanja Prijedloga zakona u prvom čitanju. Dodala je da je ipak proteklo relativno malo vremena s obzirom da je zaključak dostavljen Vijeću ministara BiH 4.5.2009. Također, predsjedavajuća je podsjetila članove Komisije da, shodno članu 104. stav (1) Poslovnika, rok za dostavljanje izvještaja Domu naroda o Prijedlogu zakona ističe 27.5.2009. S obzirom da rok za dostavljanje izvještaja još nije istekao, kao i na činjenicu da Vijeće ministara BiH nije dostavilo informaciju o aktivnostima na realizaciji navedenog zaključka Doma naroda PSBiH, predsjedavajuća je predložila članovima Komisije da se ne izjašnjavaju o Prijedlogu zakona u drugoj komisijskoj fazi nego da se usvoji zaključak kojim bi se od Kolegija Doma naroda PSBiH zatražilo da odobri produženje roka za ulaganje amandmana i dostavljanje izvještaja na Prijedlog zakona o zaštiti domaće proizvodnje u okviru Sporazuma CEFTA.

Adem Ibrahimpašić rekao je da je on protiv prijedloga predsjedavajuće Komisije te da smatra da je potrebno donošenje ovog zakona kako bi njime uticali na ukidanje bescarinskih barijera, koje susjedne zemlje uvode prilikom izvoza naših proizvoda, te da je bespredmetno odgađati izjašnjavanje i produžavati amandmansku fazu.

Jerko Ivanković Lijanović, kao predstavnik predlagača, pozvao je pomoćnika ministra vanjske trgovine i ekonomskih odnosa BiH da izvijesti Komisiju o tome da li je Ministarstvo nešto preduzelo. Rekao je da smatra da davanje novog roka neće ništa novo donijeti. Istakao je da je u međuvremenu pokrenuo konsultacije s OHR-om s ciljem otklanjanja svih nesporazuma i nedoumica nastalih nakon ovog prijedloga zakona. Istakao je da Prijedlog ovog zakona ima pravno uporište u Zajedničkoj izjavi iz Sporazuma CEFTA gdje je navedeno da domaće zakonodavstvo regulira procedure i donošenje zaštitnih mjera te da to BiH upravo čini donošenjem Zakona o zaštiti domaće proizvodnje.

Alma Čolo naglasila je da se radi o Zakonu koji može izazvati štete u bilateralnim odnosima sa susjednim zemljama, te da bi, zbog svih pisama i apela upozorenja, članovi Komisije s posebnom pažnjom trebalo da pristupe raspravi o Prijedlogu ovog zakona. Zbog svega toga predsjedavajuća Komisije ponovo je apelirala na produženje roka za izjašnjavanje o Prijedlogu zakona.

Dušan Nešković, pomoćnik ministra vanjske trgovine i ekonomskih odnosa za poljoprivredu, rekao je da je Ministarstvo sačinilo Prijedlog mjera u okviru postojećih sporazuma koje je BiH potpisala u sklopu slobodne trgovine koji je dostavljen Parlamentarnoj skupštini BiH.

Branko Zrno istakao je da je spreman da se izjasni o Prijedlogu zakona već na današnjoj sjednici ali isto tako je spreman podržati i prijedlog za produženje amandmanske faze i odgađanje dostavljanja izvještaja Komisije, kako bi se ispoštovala procedura i ostavio prostor za realizaciju zaključka Doma naroda.

Rudo Vidović saglasio se s konstatacijom da s posebnom pažnjom treba pristupiti raspravi o Prijedlogu ovog zakona. Uvažavajući Zaključak koji je usvojen na sjednici Doma naroda i stvarajući prostor za dodatne konsultacije, iskazao je spremnost da podrži prijedlog za produženje amandmanske faze i produženje roka za izjašnjavanje o Prijedlogu zakona za zaštitu domaće proizvodnje.

Slobodan Šaraba rekao je da je njegov stav da se danas Komisija treba izjasniti o Prijedlogu zakona te da nije potrebno produženje roka, jer je njegov utisak da Vijeće ministara BiH nije preduzelo mjere iz svoje nadležnosti radi zaštite domaćih proizvođača.

Jerko Ivanković Lijanović naglasio je da će u periodu nakon usvajanja ovog zakona u Domu naroda te njegovog stupanja na snagu biti obavljene konsultacije i dogovori sa susjedima kako bi usaglasili stavove. Naglasio je da se u tom periodu koji će trajati oko mjesec dana može doći do zajedničkih rješenja i dogovora.

Nakon rasprave, članovi Komisije pristupili su izjašnjavanju o predloženom zaključku koji glasi: "Traži se od Kolegija Doma naroda Parlamentarne skupštine BiH da odobri produženje roka za ulaganje amandmana na Prijedlog zakona o zaštiti domaće proizvodnje u okviru Sporazuma CEFTA do 24 sata prije održavanja naredne sjednice Komisije, te produženje roka za dostavljanje izvještaja o Prijedlogu zakona do 48 sati prije održavanja naredne sjednice Doma naroda." Zaključak je usvojen sa tri glasa „za“ i dva glasa „protiv“.

3. Razmatranje Prijedloga zakona o postupku zaključivanja i izvršavanja međunarodnih ugovora, prva komisijska faza, predlagač: Vijeće ministara BiH

Predsjedavajuća Komisije je na početku podsjetila članove Komisije da se Prijedlog zakona razmatra u skladu s članom 98. Poslovnika, tj. radi dostavljanja Domu naroda mišljenja o principima predloženog zakona. U nastavku je dodala osnovne informacije o dosadašnjoj proceduri ovog prijedloga zakona u PSBiH. Podsjetila je da je Prijedlog zakona dostavilo Vijeće ministara BiH, 17.3.2009., sa zahtjevom da se razmatra po osnovnom zakonodavnom postupku. Predstavnički dom usvojio je Prijedlog zakona u prvom čitanju na 50. sjednici, održanoj 1.4.2009., a Ustavnopravna komisija Doma naroda razmatrala je Prijedlog zakona na 37. sjednici, održanoj 12.5.2009., i tom prilikom zaključila da postoji valjan ustavnopravni osnov za usvajanje navedenog zakona kao i usklađenost sa Ustavom BiH.

Predsjedavajuća je također informirala prisutne da je, shodno odredbama člana 98. stav (2), zatraženo i dobiveno mišljenje Direkcije za evropske integracije BiH u kojem je, između ostalog, konstatirano da su sve ključne odredbe zakona koje su predmet usklađivanja usklađene s Bečkom konvencijom o ugovornom pravu, koja je u ovom slučaju referentni izvor komunitarnog prava.

Na kraju svog izlaganja predsjedavajuća Komisije je informirala prisutne da procedura izjašnjavanja u Predstavničkom domu još nije završena te kako bi se stvorile pretpostavke za eventualno usvajanje zakona i u Domu naroda u identičnom tekstu predložila je da Komisija usvoji zaključak i predloži Domu naroda njegovo donošenje, u kojem bi se produžila amandmanska faza za ovaj prijedlog zakona.

Predsjedavajuća Komisije pozdravila je predstavnike predlagača, Ministarstva vanjskih poslova BiH, i predložila da se uključe u raspravu samo ako članovi Komisije budu tražili dodatna pojašnjenja. Kako nije bilo pitanja, pristupilo se izjašnjavanju o principima predloženog zakona, te je *Komisija jednoglasno podržala principe Prijedloga zakona o postupku zaključivanja i izvršavanja međunarodnih ugovora.*

Komisija je, također, jednoglasno odlučila predložiti Domu naroda da, prilikom usvajanja Prijedloga zakona u prvom čitanju, donese i sljedeći zaključak: "S obzirom da Predstavnički dom Parlamentarne skupštine BiH još nije završio proceduru usvajanja Prijedloga zakona o postupku zaključivanja i izvršavanja međunarodnih ugovora, produžava se amandmanska faza za ovaj prijedlog zakona do 48 sati prije održavanja sjednice Komisije na kojoj će biti razmatran".

- 4. Davanje saglasnosti za ratifikaciju Protokola protiv nezakonite proizvodnje i trgovine vatrenim oružjem, njegovim dijelovima, komponentama i municijom, kojim se dopunjava Konvencija Ujedinjenih naroda protiv transnacionalnog organiziranog kriminala**
- 5. Davanje saglasnosti za ratifikaciju Protokola između Ministarstva sigurnosti BiH i Ministarstva unutrašnjih poslova i javne uprave Crne Gore o provođenju zajedničkih patrola uz zajedničku državnu granicu**
- 6. Davanje saglasnosti za ratifikaciju Sporazuma između Vijeća ministara BiH i Vijeća ministara Republike Albanije o raedmisiji lica koja iregularno borave**

Predsjedavajuća Komisije predložila je da se tač. 4., 5. i 6. razmatraju zajedno s obzirom da su sve tri u nadležnosti Ministarstva sigurnosti BiH. Također je predložila da se predstavnici nadležnog ministarstva uključe u raspravu samo ako to bude tražio neko od članova Komisije.

Prijedlog predsjedavajuće jednoglasno je prihvaćen, a nakon što nije bilo dodatnih pitanja, Komisija je jednoglasno odlučila predložiti Domu naroda davanje saglasnosti za ratifikaciju:

- Protokola protiv nezakonite proizvodnje i trgovine vatrenim oružjem, njegovim dijelovima, komponentama i municijom, kojim se dopunjava Konvencija Ujedinjenih naroda protiv transnacionalnog organiziranog kriminala;

- Protokola između Ministarstva sigurnosti BiH i Ministarstva unutrašnjih poslova i javne uprave Crne Gore o provođenju zajedničkih patrola uz zajedničku državnu granicu;

- Sporazuma između Vijeća ministara BiH i Vijeća ministara Republike Albanije o raedmisiji lica koja iregularno borave.

7. Davanje saglasnosti za ratifikaciju Prvog amandmana uz Sporazum o zajmu potpisan 25. jula 2002. godine između Bosne i Hercegovine, koju zastupa Ministarstvo finansija i trezora BiH, i Kraljevine Španije, koju zastupa Ured kreditnog instituta – Finansiranje sistema vodosnabdijevanja u općini Olovo

Obrazloženje je dala Biljana Tabaković, predstavnica Ministarstva finansija i trezora BiH. Naglasila je da se radi o Prvom amandmanu na zajam kojim se finansira izgradnja postrojenja za pitku vodu u Olovu. Istakla je da se radi o robnom kreditu čiji su uslovi ocijenjeni kao izuzetno povoljni, s rokom otplate od 36 godina, grejs periodom od 15 godina i kamatnom stopom od 0,1 %. Naglasila je da je ovim amandmanom došlo do izmjena Sporazuma o zajmu iz 2002. godine te da su one formalne i suštinske prirode. Formalne izmjene su u promjeni naziva Ministarstva a suštinske se odnose na povlačenje nepovučenog iznosa kredita. Radi se o iznosu od 21.017,67 eura koji je određen na osnovu konačne procjene situacije koju je izvođač radova podnio Općini Olovo. Istakla je također da se Amandmanom daje ovlaštenje Ministarstvu finansija i trezora BiH da verificira ukupno izvršenje ovog projekta. S obzirom da je Amandman prošao svu potrebnu zakonsku proceduru, predstavica nadležnog ministarstva predložila je članovima Komisije da Amandman upute Domu naroda na davanje saglasnosti za ratifikaciju.

Nakon izlaganja predstavnice nadležnog ministarstva, članovi Komisije jednoglasno su odlučili predložiti Domu naroda davanje saglasnosti za ratifikaciju Prvog amandmana uz Sporazum o zajmu potpisan 25. jula 2002. između Bosne i Hercegovine, koju zastupa Ministarstvo finansija i trezora BiH, i Kraljevine Španije, koju zastupa Ured kreditnog instituta – Finansiranje sistema vodosnabdijevanja u općini Olovo.

8. Razmatranje Izvještaja o radu i finansijskog izvještaja Agencije za poštanski saobraćaj BiH za 2008. godinu

Predsjedavajuća Komisije podsjetila je da se Izvještaj razmatra u skladu s članom 10. stav 9. Zakona o poštama BiH, te da je Parlamentarnoj skupštini BiH dostavljen 16.3.2009. Dodala je da je Predstavnički dom usvojio Izvještaj na 52. sjednici, održanoj 29.4.2009.

Kratko obrazloženje o izvještaju o radu i finansijskom izvještaju Agencije za poštanski saobraćaj BiH dao je Fikret Gaćanović, član Vijeća Agencije. Istakao je da je u proteklom periodu završeno konstituiranje Agencije tako da ona radi u punom kapacitetu i u skladu s povećanim brojem zaposlenih. Istakao je da je ove izvještaje prihvatio Predstavnički dom PSBiH te da se nada da će biti pozitivno ocjenjeni i u Domu naroda.

Nakon rasprave, članovi Komisije jednoglasno su prihvatili Izvještaj o radu i finansijski izvještaj Agencije za poštanski saobraćaj BiH za 2008. godinu i odlučila da predloži Domu naroda Parlamentarne skupštine BiH njegovo usvajanje u ponuđenom tekstu.

U smislu odredbi člana 107. Poslovnika Doma naroda Parlamentarne skupštine BiH, za izvjestioca u plenarnoj fazi imenovana je predsjedavajuća Komisije Alma Čolo.

9. Razmatranje Izvještaja o radu Upravnog odbora Izvozno-kreditne agencije BiH za 2008. godinu

Predsjedavajuća Komisije podsjetila je da je Izvještaj podnesen na osnovu člana 14. stav (3) Zakona o osnivanju Izvozno-kreditne agencije BiH kojim je predviđeno da je „Upravni odbor dužan Vijeću ministara BiH i Parlamentarnoj skupštini BiH dostaviti izvještaj o svom radu najmanje jednom godišnje”. Izvještaj je dostavljen Parlamentarnoj skupštini BiH, 1.4.2009. Dodala je da je Predstavnički dom usvojio Izvještaj na 52. sjednici, održanoj 29.4.2009.

Obrazloženje Izvještaja dala je Lamija Kozarić, direktor Izvozno- kreditne agencije BiH. Istakla je da je izvještaj rađen na osnovu ranijih sugestija članova Komisije u smislu kompletnije slike o ukupnom radu IGA-e. Rekla je da se IGA bavi podrškom izvoznim preduzećima kroz osiguranje naplate potraživanja, garancija i finansiranja. Istakla je da je 2008. dosta dobra poslovna godina te da je Agencija u potpunosti realizirala svoju misiju na bazi raspoloživih sredstava.

Nakon rasprave, Komisija je jednoglasno prihvatila Izvještaj o radu Upravnog odbora Izvozno-kreditne agencije BiH za 2008. godinu, i odlučila da predloži Domu naroda Parlamentarne skupštine BiH njegovo usvajanje.

U smislu odredbi člana 107. Poslovnika Doma naroda Parlamentarne skupštine BiH, za izvjestioca u plenarnoj fazi imenovana je predsjedavajuća Komisije Alma Čolo.

- 10. Razmatranje izvještaja i informacija Ministarstva vanjskih poslova BiH:**
- Informacija o sastanku Komiteta za vanjske poslove Evropskog parlamenta (AFET), Brisel, 31. 3. 2009.;
 - Izvještaj o posjeti ministra vanjskih poslova BiH Svena Alkalaja Republici Hrvatskoj;
 - Izvještaj o posjeti Salija Beriše, predsjednika Vijeća ministara Republike Albanije;
 - Informacija o liberalizaciji viznog režima – pismo osam ministara zemalja-članica EU upućeno Komisiji EU, odnosno predsjedavajućem Vijeća EU, u vezi s liberalizacijom viznog režima za zemlje zapadnog Balkana;
 - Informacija o ratifikaciji Sporazuma o stabilizaciji i pridruživanju sa BiH;
 - Informacija o plenarnom zasjedanju Evropskog parlamenta – usvajanje rezolucija o Zapadnom Balkanu i BiH.

Članovi Komisije primali su k znanju navedene informacije i izvještaje Ministarstva vanjskih poslova BiH.

11. Razmatranje izvještaja o međunarodnim aktivnostima parlamentarnih komisija i delegacija PSBiH:

- Izvještaj s parlamentarnog seminara „Vize i upravljanje granicama“, Brisel, od 31.3. do 1.4.2009.;
- Zabilješka sa sastanka Beriza Belkića i Ilije Filipovića sa Monitoring timom Sekretarijata Vijeća Evrope;
- Izvještaj sa sastanaka Komiteta za kulturu, nauku i obrazovanje (Pariz, 10. marta 2009.) i Komiteta za pravne poslove i ljudska prava (Berlin, 23. i 24. marta 2009.) Parlamentarne skupštine Vijeća Evrope;
- Izvještaj sa 120. zasjedanja Skupštine Interparlamentarne unije, održanog u Adis Abebi, od 5. do 10. aprila 2009.
- Zabilješka sa sastanka članova Zajedničke komisije za evropske integracije PSBiH s delegacijom Zajedničke komisije za evropske poslove Parlamenta Irske, održanog u Sarajevu, 4. 3. 2009.;
- Izvještaj sa 11. međuparlamentarnog sastanka Zajedničke komisije za evropske integracije PSBiH s delegacijom Evropskog parlamenta za odnose sa zemljama Jugoistočne Evrope, održanog u Briselu, 20. i 21. 1. 2009.;

Članovi Komisije primali su k znanju navedene izvještaje i zabilješke o međunarodnim aktivnostima parlamentarnih komisija i delegacija.

12. Tekuća pitanja.

U okviru ove tačke nije bilo rasprave.

Sjednica Komisije završena je u 13 sati.

Sekretar Komisije
za vanjsku i trgovinsku politiku,
carine, saobraćaj i komunikacije
Nenad Pandurević

Predsjedavajuća Komisije
za vanjsku i trgovinsku politiku,
carine, saobraćaj i komunikacije
Alma Čolo